



Pytanje za korjenjemi abo přidatne lěto na gymnaziju

Leńka Meyerec z Münstera hóstna šulerka na Serbskim gymnaziju Budyšin

Čehodla dwójce do 10.lětnika chodźić a 600 km wot doma zdalena być? Leńka Meyerec je to minjene šulske lěto činiła. Ma serbsku mać a němskeho nana a bydli z bratromaj a sotru w Münsteru. W šulskim lěće 2024/2025 pak wopyta wona serbski gymnazij a přebywaše w internaće. Zajimawe za nju bě, rozdźěl mjez šulomaj dožiwić. Nimo koncepta šule bě wězo rěč to rozsudne. Leńka je doma wot maćerje serbsce nawuknyła. Na prózdninskich kursach Rěčneho centra WITAJ je so dwójce wobdźěliła. Ale tutu “domjacu” serbsčinu w šuli nałožować, bě hišće raz wulki krok. Pisanje a wurazy, wosebje w přirodowědných předmjetach, běchu tola wužadnje. Ale Leńka to wulkotnje zmištrowała.

Dobre zawjazanje do rjadowanskeho cyłka drje so njeje radžiło, wšako nchtó ze sobušulerjow w internaće njebydleše. Leńka čuješe pak so přiwšěm derje. Wona je jara derje organizowana a šěroko zajimowana. Hnydom w přěnim tydźenju swójeho přebytku je naprašowanje w internaće přiwzała a młódšemu hólcej spušćomnje přez cyłe lěto w matematice pomhała. Tež na hudźbnu šulu je prawidłownje chodźiła, lěpje prajene jězdźiła. Leńka bě mjenujcy při kóždym wjedrje z kolesom po Budyšinje po puću. Wona je so na gitarje dale wukmanjała a lěto za dalši instrument wužiła: kneflaty akordeon. Na wšelakorych poskitkach internata je so žiwje wobdźělała.

Na kóncach tydźenjow bydleše Leńka pola wowki a džěda abo Omy a Opy. Woni maja wulki podźěl na tym, zo je so přebytk we Łužicy radžił.

Wosebje napadnył je mi jeje zajim na ručnym džěle. Přeco hdyž přińdžech do jeje stwy, měješe jehlički a wołmu w rukomaj a na wušomaj podcast z přirodowědnymi temami. Při plećenju a hóčkowanju je wosebje wušikna. Tak so samo na wušiwanje serbskeho rubiška zwaži, hačrunjež hišće ženje wušiwala njebě. Po tym zo je sej muster sama namolowała, zwaži sej hižo přenje nitki ćahać. Widžach ju zahorjenu při džěle a kóždy sučk do nitki bě kaž přiwjazanje na serbske korjenje. Nitku po nitce njerosćechu jenož kwětki na rubišku, tež jeje serbska wutroba so rozwiwaše. Ju takle wobkedźbujo sej myslach, što drje budže z rubiškom činić? Holca z tajkej serbskej wutrobu by tola kompletanu serbsku drastu měć dyrbała. Tuž so nětko z Leńku wjeselu, zo nima jenož rubiško hotowe, ale zo je so poradziło, jej wuslěkanu drastu wobstarać. Tuta skulojća a wotzamknje jeje lěto w serbskim internaće.

Monika Süßowa, kubłarka